

筠石山房詩話鈔

卷之五部

筠石山房詩話鈔

第五冊

鐵嶺楊需慰農輯

張堯佐以進士擢第累官至屯田員外郎知開州會其
姪女有寵於仁宗冊爲修媛堯佐遂驟遷擢一日中
除宣徽節度景靈羣牧四使是時御史唐介上疏引
天寶楊國忠爲戒不報又與諫官包拯吳奎等七人
論列殿上旣而御史中丞畱百官班欲以庭爭卒奪
堯佐宣徽景靈兩使特加介一品服以旌敢言未幾

堯佐復除宣徽使知河陽唐謂同列是欲與宣徽而
假河陽爲名耳我曹豈可中已耶同列依違不前唐
遂獨爭之不能奪仁宗諭曰差除自是中書介遂極
言宰相文彥博以燈籠錦媚貴妃而致位宰相今又
以宣徽使結堯佐請逐彥博而相富弼史稱時彥博在帝前介責
云之又言諫官觀望挾姦而言涉宮掖語甚切直仁宗
怒趨召兩府以疏示之介猶諍不已樞密副史梁適
叱介使下殿介諍愈切仁宗大怒玉音甚厲眾恐禍

出不測是時蔡襄修起居注立殿陛卽進曰介誠狂
直然納諫容言人主之美德必望全貸遂貶春州別
駕翊曰御史中丞王舉正救解之改爲英州別駕始
上怒未已兩府竊議曰必重貶介則彥博不安彥博
去則吾屬遞遷矣旣而果如其料當是時梅堯臣聖
俞作書竄詩曰皇祐辛卯冬十月十九日御史唐子
方危言初造膝曰朝有巨姦臣介所憤疾願條一二
事臣職敢妄率巨姦宰相博邪行世莫匹曩時守成

都委曲媚貴暱銀鐙插左貂窮臘使馳驛邦媛將夸
後中賫金十鎰爲我寄使君青紋織織密遂傾西蜀
巧日夜急鞭扶紅經緯金縷排科鬪八七比比雙蓮
花篝燈戴心出幾日成一端持行如鬼疾明年觀上
元被服穩稱質璨然驚上目遽爾有薄詰旣聞所從
來佞對似未失且云奉至尊於妾豈能必遂回天子
顏百事容丐乞臣今得初陳狡猾彼非一偷威與賣
利次第推甲乙是唯陰猾雄仁斷宜勇黜必欲致太

平在列無如弼

此下缺一字疑仍是弼字

亦昧平生況臣不阿

屈臣言天下公奚以身自卹君旁有側目暗啞橫詆

叱指言爲罔上廢汝還蓬華是時白此心尙不避斧

鑕雖令禦魑魅甘且同飴蜜旣知勿可懼復以強詞

窒帝聲亦大厲論奏不容畢介也容甚閑猛士膽爲

慄立貶嶺外春速欲爲異物內外臣恟恟陛下何未

悉卽敢救者誰襄執左史筆謂此儻不容盛美有所

拂平明中執法懷疏入堅述介言或以狂百豈無一

實恐傷四海和幸勿若倉卒亟許遷英山衢路有嗟
咄翊曰宣白麻稱快口盈溢阿附連諫官去若懷絮
虱其間因獲利竊笑等蚌鷸英州五千里瘦馬行駢
駢毒蛇噴曉霧晝與嵐氣沒妻孥不同塗風浪過蛟
窟存亡未可知旅館愁傷骨飢僕時後先隨猿拾橡
栗越林多蔽天黃甘雜丹橘萬室通釀酤撫遠無禁
律醉去不須錢醒來弄鳴瑟山水仍奇怪已可消愁
鬱莫作楚大夫懷沙自沉汨西漢梅子真出爲吳市

卒市卒且不慙況茲別秉秩始堯臣作此詩不敢示人及歐陽文忠公爲編其集時有避嫌又削去此詩是以人少知者故今盡錄

東軒筆錄

按綱目大書曰以張堯佐爲宣徽使貶殿中侍御史裏行唐介爲英州別駕文彥博免

鑑云帝罷文彥博知許州慮介或道死有殺直臣名命中使護之士大夫以詩送者甚眾獨待制李師中一篇爲人傳誦詩云孤忠自許眾不與獨立

敢言人所難去國一身輕似葉高名千古重如山
並遊英俊顏何厚未死姦諛骨已寒天爲吾皇扶
社稷肯教夫子不生還介在神宗朝果大用人以
爲詩識並遊英俊爲諫官吳奎畏縮而發也

邊人傳誦一詩云昨夜陰山吼賊風帳中驚起紫髯翁
平明不待全師出連把金鞭打鐵驄

以上二條東軒

筆錄

天聖中丞相王公隨雅嗜吟咏有宮詞云一聲啼鳥禁

門靜滿地落花春日長又野步云桑斧刊春色漁歌

唱夕陽

青箱雜記

西湖橫斜浮動之句屢爲前輩擊節常恨未見其全篇
及得其集觀之云眾芳搖落獨鮮妍占盡風情向小
園疎影橫斜水清淺暗香浮動月黃昏霜禽欲下先
偷眼粉蝶如知合斷魂幸有微吟可相狎不須檀板
共金樽其卓絕不可及者專在十四字耳又有七言
數篇皆無如池水倒窺疎影動屋簷斜入一枝低雪

後園林纔半樹水邊籬落忽橫枝之句

碧溪詩話

范文正淮上遇風云一棹危於葉旁觀亦損神他年在平地無忽險中人雖弄翰戲語卒然而作兼濟加澤之心可見未嘗忘也

全上

余嘗赴京師往辭伯父坐中舉兄弟送行詩云問人求穩店下馬過危橋及觀坡集見送姪安節詩言其伯曾有送老蘇下第歸蜀云人稀野店休安枕路人靈關穩跨驢之句余官辰沅逾年族弟來相視將行率

爾送之云就舍勿令人避席渡江莫與馬同船雖鄙
近不工亦可用於畏途也

以上三條碧溪詩話

古人行役異鄉懷歸感歎而意有相同者如竇鞏云風
雨荊州二月天問人初顧峽中船西南一望雲和水
猶道黔南有四千柳宗元云林邑山聯瘴海秋牂牁
水向郡前流勞君先問龍池地正北三千到錦州皆
佳作也

墨莊漫錄

七言絕句唐人之作往往皆妙近人亦多可喜予每愛

俞紫芝秀老歲杪山中云石亂雲深客到稀鶴和殘
雪在高枝小軒日午貪濃睡門外春風過不知舒
信道村居云水繞陂田竹繞籬榆錢落盡槿花稀夕
陽牛背無人臥帶得寒鴉兩兩歸崔鶼德符秋日卽
事云秋草門前已沒韉更無人過野人家離離疎竹
時聞雨淡淡輕煙不隔花又黃州道中云莫愁微雨
落輕雲十里長亭未墊巾流水小橋山下路馬頭無
處不逢春劉次莊中叟桃花云桃花雨過碎紅飛半

逐溪流半染泥何處飛來雙燕子一時銜在畫梁西
僧如璧德操偶成云松下柴門晝不開只有蝴蝶雙
飛來蜜蜂兩髀大如蠶應是山前花又開吳可思道
病酒云無聊病酒對殘春簾幙重重更掩門惡雨斜
風花落盡小樓人下欲黃昏又春霽云南國春光一
半歸杏花零落淡胭脂新晴院宇寒猶在曉絮欺風
不肯飛趙士掞才儒登天清閣云夕陽低盡已西紅
百尺樓高萬里風白髮年年何處得只應多在倚欄

中曾紆公袞江樾軒書事云臥聽灘聲瀲瀲流冷風
淒雨似深秋江邊石上烏柏樹一夜水長到梢頭胡
直孺少汲春日云風雲吹絮柳飛花睡起鉤簾曰半
斜四海隨人雙燕子相逢處處作生涯曾繹仲成還
家塗中云疎林殘影起昏鴉臘盡行人喜近家江北
江南春信早傍籬穿竹見梅花劉無極希顏漾花池
云一池春水綠如苔水上新紅取次開閒倚東風看
魚樂動搖花片却驚猜王銍性之山村云家依溪口

破殘村身伴渡頭零落雲更向空山拾黃葉姓名那
有世人聞陳與義去非秋夜云中庭淡月照三更白
露洗空河漢明莫遣西風吹葉落只愁無處着秋聲
如此之類不愧前人

全上

黃魯直有乞貓詩云秋來鼠輩欺貓死窺甕翻盆攪夜
眠聞道狸奴將數子買魚穿柳聘銜蟬蔡天啟乞貓
於孫元忠亦有詩云廚廩空虛鼠亦飢終宵咬齧近
秋帷腐儒生計惟黃卷乞取銜蟬與護持

全上

陳興祖德昭云頃見一詩話題云李公彥季成作內載
蜀主孟昶與花蕊夫人夜起納涼摩訶池上作洞仙
歌其詩曰冰肌玉骨清無汗水殿風來暗香滿簾間
明月獨窺人欹枕釵橫雲鬢亂三更庭院悄無聲時
見疎星度河漢屈指西風幾時來只恐流年暗中換
以上四條墨莊漫錄

律詩難於古詩絕句難於八句七言律詩難於五言律

詩五言絕句難於七言絕句

詩體